

Kristiannan ku ta Mal Hende

Tin un laso estrecho entre kreensia i kondukta. Loke bo ta kere ta afektá bo komportashon. Por ehèmpel, tin hende ku no ta kere ku Dios ta eksistí. Algun di nan ta hende ku ta hiba un bida moral. **Ma echu ta ku nan NO ta biba konforme ku nan kreensia. Un persona ku di bèrdat ta sigui e siñansa ateo lo NO ta bon hende.** Si Dios no ta eksistí, ta pa kasualidat bo ta hala rosea riba mundu; ta impusibel pa bo ta kreashon di un Dios ku no ta eksistí. Si Dios no ta eksistí bo eksistensia riba mundu ta sin proposito. Si Dios no ta eksistí, bo no tin un destino etèrno despues di morto; bo no por duna kuenta na un Dios ku no t'ei.

Pues, si bo biba konforme e kreensia di ateísmo, lo bo biba pa sasia tur bo deseonan, sea ta legal òf ilegal, sea ta moral òf immoral. Si Dios no ta eksistí, pakiko ehersé disiplina propio? Pakiko papia bèrdat? Pakiko no gosa aventuranan seksual ku kualke i kuantu partner ku bo ke? Pakiko no komportábo pió ku bestia? Pakiko no mata bo enemigunan? Pakiko no kometé suisidio ora bida ta desepshonábo?

Ateísmo no ta—i no por—produsí mihó hende. Adolf Hitler, siguiendo ateísmo, a mata seis mion hudiu. Hosé Stalin, ku e mésun kreensia, a deshasí di 50 mion di su mes paisanonan.

Di otro banda tin kristianismo. Segun Skritura, ora bo ta atmití na Dios ku bo ta un pekadó ku ta meresé sufrimentu na fièrnu pa tur etèrnidat, ta realisá ku Hesu-Kristo a tuma bo kastigu riba krus, ta bira lomba pa piká i ta hasi e desishon pa konfia Kristo por kompleto, E lo salbábo di e kastigu ei. Na e momentu ei bo ta bira un kristian, un siguidó di Kristo. Palabra di Dios ta bisa ku bo ta bira “*un kriatura nobo...kosnan bieu a pasa kaba; ata, tur kos a bira nobo*” (2 Korintionan 5:17).

Ma tin hende ku un inkietut sinsero: “Mi konosé hende kristian ku ta MAL hende!” Konsekuentemente nan no ke tuma e desishon pa konfia Kristo so pa salbashon.

Nan tin rason. Algun hende ku ta yama nan mes kristian, ta duna mal impreshon di Esun ku nan ta sigui, ta kometé aktonan skandaloso, ku ta pió ku pagano. Ta bèrdat, ku tin kristian ku ta mal hende! Chuck Colson a komentá, “Kristianismo no ta hasi hende perfekto. Ma e ta hasi nos mihó ku nos lo tabata. Kita e leinan di Dios ku ta restringí (hende), i e barbaridatnan di mas malu ta resultá.”

Evelyn Waugh tabata konosí pa su palabranan skèrpi ku asta a heridá su amigunan. Un señora a puntr'é, “Kon bo por komportábo asina, i tòg yama bo mes un kristian?” “Señora,” Waugh a respondé, “talbes mi ta mal hende manera bo ta bisa. Ma kerémi, sino tabata pa mi religion, apenas lo mi ta un ser humano.” Kristianismo TA hasi nos **mihó** hende.

Segun Edith Schaeffer, e echu ku Adam i Eva a hasi piká ta afektá kada persona diferente manera. Fisikalmente, algun ta fuerte i atlétiko; otronan ta debil i enfermo. Di igual manera, algun hende di mes tin bon karakter; otronan ta nase ku un karakter desagradabel. Ora un hende ta aseptá Kristo, Dios no ta likidá e diferensianan aki. Ma ora bo ta aseptá Kristo bo ta haña e poder pa yuda produsí un kambio.

C.S. Lewis a splik'é di e siguiente forma. Un machi bieu amargá i terko talbes ta mal propaganda pa e fe kristian. Ma ken por bisa kuantu MAS fastioso e machi ei lo ta si e NO tabata kristian?

Di otro banda, un hende ku nunca a yega di konfia Kristo komo su Salbador por ta kariñoso i plasentero. Ma ken por bisa kuantu mas mihó e lo tabata si e tabata un kristian?

Esun ku ta sigui siñansa ateo, irespekto di kon bon e por ta, lo ta pió. En kontraste, ora un kristian ta aktua konforme ku e doktrina di Kristo, asta djis un tiki, apesar di kon mal hende e ta, lo e ta mihó hende!